



Мирослава Крлеже 1, 76100 Брчко дистрикт Босне и Херцеговине; Телефон: 049 220 890, Факс: 049 212 984  
Miroslava Krleže 1, 76100 Brčko distrikt Bosne i Hercegovine; Telefon: 049/220 890, Faks: 049/212 984

**Broj predmeta:** 02-000180/17  
**Broj akta:** 01.11-1161DS-003/17  
**Datum:** 19.07.2017. godine  
**Mjesto:** Brčko

Na osnovu člana 52. Statuta Brčko distrikta Bosne i Hercegovine – prečišćeni tekst („Službeni glasnik Brčko distrikta BiH“, broj 2/10), člana 10. i člana 11. stav (3) Zakona o Vladi Brčko distrikta Bosne i Hercegovine („Službeni glasnik Brčko distrikta BiH“, broj: 19/07, 36/07, 38/07, 2/08, 17/08, 23/08, 14/10 i 28/12), a u skladu s članom 30. Zakona o deviznom poslovanju u Brčko distriktu Bosne i Hercegovine („Službeni glasnik Brčko distrikta BiH“, broj 23/16), na Prijedlog Direkcije za finansije Brčko distrikta BiH, broj: 02-04.1-490/16 od 3. 7. 2017. godine, Vlada Brčko distrikta BiH, na 18. redovnoj sjednici održanoj 19. jula 2017. godine, d o n o s i

## **P R A V I L N I K O USLOVIMA I NAČINU OTVARANJA DEVIZNIH RAČUNA U INOSTRANSTVU**

### **Član 1. (Predmet)**

Ovim pravilnikom utvrđuju se uslovi i način na koji rezident može dobiti dozvolu za otvaranje deviznih računa u inostranstvu i držanje deviza na računu u inostranstvu (u daljnjem tekstu: dozvola).

### **Član 2. (Uslovi za izdavanje dozvole)**

(1) Rezident može dobiti dozvolu pod uslovom da na računu za redovno poslovanje nema nenamirenih dospjelih obaveza, u smislu propisa o finansijskom poslovanju i propisa o platnim transakcijama u Brčko distriktu Bosne i Hercegovine (u daljnjem tekstu: Distrikt).

(2) Rezidentu se izdaje dozvola pod uslovom da se koristi za sljedeće namjene:

a) za izvođenje investicionih radova u inostranstvu dozvola se može izdati do 30% vrijednosti ugovorenog posla, i to ukupno:

1) za predujam primljen od stranog partnera ako je otvaranje računa u inostranstvu uslov dobijanja predujma, uz dostavu kopije ugovora o izvođenju investicionih radova;

2) za inostrani kredit dobijen za finansiranje tog posla koji je uslovljen otvaranjem računa u inostranstvu, uz dostavu kopije ugovora o kreditu;

3) za potrebe snabdijevanja i održavanja radilišta u inostranstvu, i to za troškove: smještaja, prehrane i boravka radnika, plata, poreza, osiguranja i za druge tekuće troškove u visini prosječnih jednomjesečnih troškova za te namjene, uz podnošenje predračuna;

b) za istraživačke radove u inostranstvu uz podnošenje ovjerenih kopija ugovora o koncesiji za te radove;

c) za polaganje garantnog depozita do iznosa iz ugovora zaključenog sa stranim partnerom ili iznosa predviđenog propisom strane zemlje, ili raspisanim međunarodnim tenderom, odnosno

licitacijom, uz podnošenje ovjerene kopije jednog od sljedećih dokaza: ugovora, zahtjeva stranog partnera, prevoda propisa strane zemlje ili uslova iz raspisanog međunarodnog tendera, odnosno licitacije;

d) za realizaciju inostranog kredita čije je korištenje uslovljeno otvaranjem računa kod banke u inostranstvu, uz podnošenje kopija ugovora o kreditu;

e) za kupoprodaju vrijednosnih papira u inostranstvu dozvola se može izdati najviše do visine iznosa propisanih članovima 79. i 101. Zakona o investicionim fondovima, a uz zahtjev za izdavanje dozvole mora biti priložena sljedeća dokumentacija:

1) kopija ugovora s inostranim ovlaštenim društvom ili kopija druge dokumentacije u kojoj je naveden uslov otvaranja računa u inostranstvu za potrebe kupoprodaje vrijednosnih papira;

2) kopija dokumenta iz kojeg se vidi kolika je imovina fonda, a ako je ulagač rezident investicioni fond;

f) praćenje ulaganja iz tačke e) ovog člana investicionih fondova u periodu na koji se odobrenje odnosi vrši depozitar fonda o čemu je dužan da Direkciji za finansije Brčko distrikta BiH (u daljnjem tekstu: Direkcija) dostavlja kvartalne izvještaje, a ako rezident ulagač nije fond, dozvola se može izdati najviše do iznosa 20% neto vrijednosti njegove imovine;

g) da je vrijednost portfolija inostranih vrijednosnih papira dokazana izvodom s računa vrijednosnih papira rezidenta kod banke skrbnika;

h) za plaćanje troškova predstavništva i poslovnih jedinica osnovanih u inostranstvu u skladu sa zakonom kojim se uređuje vanjskotrgovinsko poslovanje u inostranstvu prilikom čega zahtjevu za izdavanje dozvole za ovu namjenu mora biti priložena kopija registracije predstavništva i poslovne jedinice u inostranstvu;

i) za plaćanje troškova rezidenata koji pružaju usluge u međunarodnom robnom i putničkom prometu, uz podnošenje kopija registracije za obavljanje vanjskotrgovinskog prometa;

j) za plaćanje troškova društva za osiguranje, uz podnošenje kopija saglasnosti nadležne agencije za nadzor osiguranja, pri čemu se dozvole za otvaranje deviznog računa u inostranstvu za slučajeve navedene u tačkama e), f), g), h) i i) ovog člana izdaju do visine planiranih prosječnih dnevnih stanja sredstava na računu potrebnih za pokrivanje troškova;

k) za naplatu potraživanja u netransferabilnoj valuti, odnosno domicilnoj valuti odnosno zemlje koja se prema propisu te zemlje ne može transferirati, koja se odnose na:

1) izvođenje investicionih radova ako je propisom odnosne zemlje ili raspisanom licitacijom ili tenderskom dokumentacijom takav uslov predviđen, gdje uz obrazloženi zahtjev, rezident podnosi izvod iz propisa odnosne zemlje, izvod iz raspisane licitacije ili izvod iz tenderske dokumentacije;

2) pružanje usluga u međunarodnom robnom i putničkom prometu, uz podnošenje isprava kojima se dokazuje opravdanost naplate i mogućnost utroška netransferabilne valute;

l) za naplate po sudskim rješenjima u inostranstvu za koje je uslovljeno otvaranje deviznog računa u inostranstvu, uz podnošenje kopije odgovarajućeg rješenja;

m) za potrebe poslovanja u inostranstvu državnih tijela, tijela osnovanih posredovanjem Bosne i Hercegovine i tijela osnovanih na osnovu međunarodnih ugovora koje je potpisala Bosna i Hercegovina;

n) za potrebe školovanja ili stručnog usavršavanja u inostranstvu, uz podnošenje potvrde o školovanju ili stručnom usavršavanju izdate od strane institucije;

o) za potrebe liječenja u inostranstvu uz podnošenje preporuke ili uputnice za liječenje u inostranstvu.

(3) Rezidenti mogu neutrošenu netransferabilnu valutu, stečenu pod uslovima iz ovog pravilnika, prodati drugom rezidentu.

### **Član 3.**

#### **(Zahtjev za izdavanje dozvole)**

(1) Zahtjev za izdavanje dozvole (u daljnjem tekstu: zahtjev) rezident podnosi Direkciji.

(2) Zahtjev sadrži: namjenu, iznos za koji se traži dozvola, naziv zemlje i inostrane banke kod koje se otvara račun.

- (3) Uz zahtjev je potrebno priložiti dokumentaciju propisanu ovim pravilnikom i dokaz o uplati administrativne takse u skladu sa Zakonom o administrativnim taksama Brčko distrikta BiH.
- (4) Direkcija može zatražiti, u slučaju potrebe, i drugu dokumentaciju u vezi s poslovanjem rezidenta.
- (5) Sve kopije dokumenata koje se prilažu uz zahtjev moraju biti ovjerene kod nadležnog organa.
- (6) Dozvola se izdaje na period od jedne godine, uz mogućnost produženja, a najduže dok traje obaveza iz ugovora.
- (7) Postupak izdavanja dozvole provodi se u skladu sa Zakonom o upravnom postupku Brčko distrikta BiH.

#### **Član 4.** **(Dužnost rezidenta)**

- (1) Rezident je dužan osigurati da prosječno dnevno stanje sredstava na računu u inostranstvu u tromjesečju ne pređe iznos koji je odobren u dozvoli.
- (2) Prosječno dnevno stanje sredstava na računu u tromjesečju izračunava se tako da se saberu dnevna stanja u toku tromjesečja svakog radnog dana i da se dobijeni zbir podijeli brojem radnih dana tog tromjesečja.
- (3) Rezident je dužan izvještavati Direkciju o stanju sredstava na računu u inostranstvu u skladu s uslovima iz dozvole.
- (4) Dužnost iz stava (1) i (3) ovog člana ne odnosi se na fizička lica kojima je dozvola izdata za potrebe školovanja ili liječenja u inostranstvu.

#### **Član 5.** **(Rokovi za prenos sredstava)**

- (1) Sredstva s računa u inostranstvu rezident je dužan doznačiti na svoj račun u Distriktu u roku od 30 dana od prestanka uslova zbog kojih je dobio dozvolu.
- (2) Kod izvođenja investicionih radova u inostranstvu rezident je dužan doznačiti sredstva na svoj račun u Distriktu u roku od šest mjeseci od dana završetka radova.
- (3) Izuzetno od stava (1) i (2) ovog člana, produženje roka važenja dozvole za držanje deviza na računu u inostranstvu može se odobriti za preostali iznos nenaplaćenih investicionih radova ili za period do pribavljanja potrebne dokumentacije za zatvaranje računa uslovljene propisom zemlje.
- (4) Nakon prenosa sredstava s deviznog računa u inostranstvu u Distrikt rezident je dužan zatvoriti račun kod banke u inostranstvu i o tome obavijestiti Direkciju.

#### **Član 6.** **(Stupanje na snagu)**

Ovaj pravilnik stupa na snagu osmog dana od dana objavljivanja u „Službenom glasniku Brčko distrikta BiH“, a primjenjivat će se na rezidente koji otvaraju devizne račune u inostranstvu nakon stupanja na snagu ovog pravilnika.

**GRADONAČELNIK**  
**Mr. sc. Siniša Milić, s. r.**